

27/09/2003

Juruterbang TUDM janjikan aksi terbaik

LANGKAWI: Juruterbang Tentera Udara Diraja Malaysia (TUDM) menjanjikan aksi terbaik ketika melakukan formasi di udara, biar pun akur dengan kehebatan pasukan aerobatik popular Britain, Red Arrows yang turut menyertai Pameran Udara dan Maritim Antarabangsa Langkawi 2003 (Lima `03).

Malah, pasukan MiG-29N dari Skuadron ke-17 dan ke-19 serta Skuadron Ke-18 F/A-18D Hornet berhasrat untuk terus mencuri tumpuan sebagaimana dilakukan mereka pada Lima `01 ketika menggantikan Red Arrows yang menarik diri.

Pengarah Pertunjukan Udara Lima `03, Brig Jen Datuk Bashir Abu Bakar, yakin skuadron yang masing-masing berpangkalan di Kuantan dan Butterworth itu mampu memberikan persembahan menarik.

"Kita akan membuktikan juruterbang tempatan yang dilatih menerbangkan pesawat juang bagi menghadapi peperangan di udara juga mempunyai kepakaran membuat pertunjukan udara.

"Mereka akan melakukan pergerakan bersepadu di udara dengan menggabungkan taktikal sebenar ketika peperangan di udara dan formasi yang biasa dilakukan mana-mana pasukan aerobatik," katanya.

Bercakap ketika ditemui pemberita di sini, semalam, beliau berkata, pasukan MiG-29N yang diketuai Kolonel Affendi Buang dan Kolonel Khairuddin Mohd Radzi bagi pasukan F/A 18D sudah dua minggu menjalani latihan dan kini sedia melakukan pertunjukan.

Katanya, mereka akan melakukan pertunjukan di udara selama sejam mulai 10.45 pagi dan antara jam 2 petang hingga 4 petang pada hari perasmian, Selasa ini, diikuti setiap hari pameran mulai jam 2 petang hingga 5 petang.

Pertunjukan itu, katanya, membabitkan tujuh pesawat MiG-29N dan enam pesawat F/A-18D Hornet.

"Selain itu, juruterbang TUDM dari Skuadron ke-12 yang berpangkalan di Butterworth juga akan mempamerkan kepakaran menerbangkan pesawat juang F5E pada hari perasmian," katanya.

Seramai 200 anggota TUDM dari 10 Briged Para yang berpangkalan di Melaka juga akan melakukan penerjunan dari dua pesawat C130 pada hari perasmian.

Beliau yang juga Komander Pertama Divisyen Udara berkata, satu kejutan akan dilakukan TUDM pada majlis perasmian oleh Perdana Menteri, Datuk Seri Dr Mahathir Mohamad, tetapi enggan mengulas lanjut bentuk kejutan itu.

Pada Lima `01, TUDM mendapat pujian ramai apabila pasukan juruterbang mereka berjaya mempamerkan formasi hebat di udara sekali gus menebus rasa hampa peminat akibat penarikan diri Red Arrows.

Pertunjukan akrobatik udara adalah suatu kemestian sebagai pembukaan tirai di setiap pameran udara bertaraf antarabangsa dan Lima tidak terkecuali.

Pameran Lima kali ini dijangka disertai 103 pesawat dan 114 kapal dari dalam dan luar negara.